

आकाशवाणी

खबरां -----

1. प्रधानमंत्री नरेंद्र मोदी होरें भारत गी आत्त्रिर्भर बनाने आस्तै देशवासिएं गी 9 मंत्र दित्ते न, श्री मोदी होरें अज्ज उडुप्पी दे श्री कृष्ण मठ च आयोजित कार्यक्रम च हिस्सा लैता।
2. राष्ट्रपति द्रौपदी मुर्मू होरें आखेआ ऐ जे सरकार समाज गी मता समग्र, शांतिपूर्ण, सेहतमंद ते मुल्लें कदरें पर आधारत बनाने आस्तै कई गैंई पुट्टा'रदी ऐ।
3. रक्षा मंत्री राजनाथ सिंह होरें आखेआ ऐ जे भारत हुन भारत प्रशांत ते वैश्विक दक्खन दे इक भरोसेमंद भ्याल दे तौर पर वैश्विक चर्चाएं गी नमा आकार देआ करदा ऐ।
4. उत्तर प्रदेश च हुन आधार कार्ड गी जनम प्रमाण पत्र जां जनम दी तरीक दे सबूत दे तौरा पर मंजूर नेई कीता जा करग।
5. ते रूस दे राष्ट्रपति व्लादिमीर पुतिन 23में भारत-रूस सालाना शिखर सम्मेलन च हिस्सा लैने आस्तै 4 दिसंबर थमां भारत दी सरकारी जात्तरा पर आवा'रदे न, इस दुरान ओहू प्रधानमंत्री नरेंद्र मोदी हुं'दे कन्नै गल्लबात करडन।

PM-9 Mantras

प्रधानमंत्री नरेंद्र मोदी होरें देसै गी आत्मनिर्भर बनाने आस्ते समर्पित 9 संकल्पें दे प्रति लोकें दी प्रतिबद्धता दा आह्वान कीता। इस मौके पर प्रधानमंत्री होरें उडुप्पी च श्री कृष्ण मठ दे श्रद्धालुएं गी बी संबोधित कीता। प्रधानमंत्री होरें अज्ज जि'नें 9 प्रस्तावें दा जिक्र कीता, उंदे चा इक साढी परानी पांडुलिपियें दा संरक्षण बी ऐ। प्रधानमंत्री होरें इ'ब्बी आखेआ ऐ जे साढा पराना ज्ञान अगली पीढी तगर बी पजाया जाना चाहिदा। उनें भारती लोकें अगगे अपील कीती ऐ जे ओहू अपनी विरासत ते परम्पराएं कन्नै जुडी दियें प्रसिद्ध 25 थाहें दी यात्रा करनं प्रधानमंत्री होरें अगगे आखेआ ऐ जे भागवत गीता जेहड़ी भगवान श्री कृष्ण हुं'दी शिक्षा ऐ, केंद्र सरकार दे मते सारे कार्यक्रमें लेई म्हेशा प्रेरणा स्रोत रेही ऐ।

<><><><><><>

Prez. Society

राष्ट्रपति द्रौपदी मुर्मु होरें आखेआ जे भारत सरकार समाज गी होर मता समावेशी, शांतिपूर्ण, सोआस्थ ते मूल्य-आधारित बनाने आस्ते कई महत्वपूर्ण कदम चुक्का'रदी ऐ। राष्ट्रपति होरें गलाया जे योग ते ध्यान गी वैश्विक स्तर पर बढ़ावा देना ते अंतर्राष्ट्री योग दिवस अभियान दा नेतृत्व करना इक नेही गै पेहल ऐ। राष्ट्रपति होरें अज्ज एहू गलल उत्तर प्रदेश दे लखनऊ च ब्रह्माकुमारीज दी 2025-26 दी सालाना थीम, 'विश्व एकता और विश्वास के लिए ध्यान' कार्यक्रम दे शुभारंभ समारोह दरान आक्खी। उनें आखेआ जे भारत दी प्राचीन सभ्यता नै सदा दुनिया गी वसुधैव कुटुम्बकम दा संदेश दित्ता ऐ।

राष्ट्रपति होंरें आखेआ जे अज्ज दुनिया कई चुनौतियें दा सामना करा रदी ऐ। समाज च मूल्यें गी स्थापित करने दे सरकार दे जत्तें दा उल्लेख करदे होई राष्ट्रपति होंरें आखेआ जे राष्ट्री शिक्षा नीति च मूल्य-आधारित शिक्षा पेहल बी शामिल ऐ। उनें गलाया जे महिलाएं दे सम्मान ते सामाजिक समावेश गी बढ़ावा देने आस्तै बी कार्यक्रम चलाए जा'रदे ना।

<><><><><><>

PM-Chhatisgarh

प्रधानमंत्री नरेन्द्र मोदी कल्लै थवां छत्तीसगढ़ दे दो-दिन दे दौरे पर रौहगंन। इस दौरान प्रधानमंत्री पुलस महानिरीक्षकें दे 60में अखिल भारतीय सम्मेलन च हिस्सा लैगंन। मोदी होर विशिष्ट सेवा आस्तै राष्ट्रपति पुलस पदक बी प्रदान करगंन। त्रै-दिन दा एह सम्मेलन अज्जै थमां रायपुर च शुरु होग। इसदा मकसद पुलस चुनौतियें दे हल च होई दी प्रगति दी समीक्षा करना ते विकसित भारत दे नजरिए मूजब सुरक्षित भारत दे निर्माण दी रुपरेखा तयार करना ऐ। सम्मेलन च गृहमंत्री अमित शाह राष्ट्रीय सुरक्षा सलाहकार अजीत डोभाल ते गृह राज्य मंत्री Bandi Sanjay Kumar होर शामिल होगंन।

<><><><><><>

UGC-Timely Exams

विश्व विद्यालय अनुदान आयोग नै उच्च शिक्षा संस्थानें दे समें पर इम्तेहान आयोजित करने ते उपाधियां ते प्रमाण-पत्र तौले जारी करने दा निर्देश दिता ऐ। आयोग नै आखेया ऐ जे इसदे च चिर करी विद्यार्थियें दे मौके दा नुक्सान हुंदा ऐ ते उनेंगी सेई ते गुणवत्तापूर्ण रोजगार हासिल करने च रुकावट औंदी ऐ। आयोग नै आखेया ऐ जे विद्यार्थी

नतीजें घोषित होने दे 180 दिनें दे अंदर-अंदर डिग्री हासिल करने दा बी हक्कदार ऐ। एह बी आखेया गया ऐ जे नियमें दी पालमा नई करने दी स्थिति च आयोग दंडात्मक कारवाई करोग।



Jitendra-ANRF

विज्ञान ते प्रौद्योगिकी राज्य मंत्री डॉ. जितेंद्र सिंह होरें अज्ज आखेआ जे अनुसंधान नेशनल रिसर्च फाउंडेशन-ए.एन.आर.एफ. भारत गी वैश्विक अनुसंधान ते नवाचार दा शक्तिशाली केंद्र बनाने आस्तै महत्वपूर्ण संस्था दे तौर पर उभरा'रदा ऐ। श्री सिंह होरें अज्ज नमी दिल्ली च ए.एन.आर.एफ. दी व्यापक समीक्षा दे दरान एहू गल्ल आक्खी। उनें इस गल्लै पर ज़ोर दित्ता जे भारत आस्ता-आस्ता सम्पूर्ण सरकार ते पूरे समाज दे अनुसंधान ते विकास मॉडल आहली बक्खी अगगे बदा'रदा ऐ। नेय माहौल च मंत्रालय, उद्योग, स्टार्टअप, समाज-सेवी प्रतिष्ठामन ते शिक्षा जगत मिलियै राष्ट्री नवाचार गी प्रोत्साहन देडन।



Rajnath-CDD

रक्षा मंत्री राजनाथ सिंह होरें आखेआ ऐ जे अज्जै दा भारत वैश्विक बचारें गी मूर्त रूप देआ करदा ऐ ते हिंद प्रशांत ते वैश्विक दक्खन दे मुल्ख इक विश्वसनीय सांझेदार दे रूप च भारत आहली बक्खी उत्सुकता कन्नै दिक्खा करदे ना। चाणक्य रक्षा संवाद-सी.डी.डी 2025 गी संबोधित करदे होई श्री सिंह होरें आखेआ जे बदलदे वैश्विक हालात च भारत

बी बदलाव दे दौर शा लंघा करदा ऐ। उनें आखेआ जे साढी बधदी अर्थ बवस्था, उन्नत तकनीकें दी प्रगति ते सैद्धांतिक कूटनीति दे प्रति अनत्रुट बचनबद्धता नै असेंगी संतुलन, स्थिरता ते जिम्मेदारी दी अवाज दे रूप च उभरने-जोग बनाया ऐ। रक्षा मंत्री होरें आखेआ जे भारत सदा गै शांति ते संवाद च विश्वास करदा रेआ ऐ। भारत इस नजरिये दे प्रति बचनबद्धत ऐ पर राष्ट्र दी सम्प्रभुता ते देशवासिएं दी सुरक्षा गी लेइयै कदे कोई समझौता नेई करदा। उनें आखेआ जे देसै दे थेआरबंद बलें बार-बार एहू दस्सेआ ऐ जे ओहू सक्षम ते तैयार ना। श्री सिंह होरें आखेआ जे विकसित भारत इक सुरक्षित भारत दे बगैर मुमकन नेई ऐ ते सुरक्षित भारत सशक्त भारत दे बगैर नामुमकिन ऐ।

<><><><><><>

UP-Aadhaar

उत्तर प्रदेश सरकार नै स्पष्ट कीता ऐ जे आधार कार्ड हुन राज्यें च जन्म प्रमाण पत्र या जन्म तिथि दे रूप च स्वीकार नेई कीता जाहग। राज्य दे नियोजन विभाग नै एहू निर्देश जारी करदे होई एहू आखेआ ऐ जे आधार कार्ड च कोई आधिकारिक रूप कन्नै प्रमाणित जन्म रिकॉर्ड नेई होंदा ऐ। नियोजन विभाग दे विशेष सचिव अमित सिंह बंसल होरें राज्य दे सभनें विभागें गी जन्म सरबन्धी सत्यापन आस्तै आधार कार्ड गी स्वीकार नेई करने दे निर्देश दित्ते ना।

<><><><><><>

PM Blind Cricket Team

प्रधानमंत्री नरेन्द्र मोदी होंरें टी-20 विश्व कप विजेता महिला दृष्टिबाधित क्रिकेट टीम कन्नै मलाटी कीती। प्रधानमंत्री होंरें सोशल मीडिया पोस्ट च इस बारे दस्सेया। महिला टीम नै प्रधानमंत्री मोदी होंरें गी दस्तख्त कीते दा इक Bat बी भेंट कीता। भारतीय टीम नै नेपाल गी 7 विकेटे कन्नै हराया। प्रधानमंत्री होंरें आखेया जे खडारियें उन्दे कन्नै प्रेरक अनुभव सांझा कीते।



GPF-Revision

जम्मू-कश्मीर वित्त मैटकमे नै माली ब'रे 2025-26 दी दुई ते त्री तिमाही आस्तै जनरल प्रोविडेंट फंड यानि (जी.पी.एफ) दी ब्याज दर च संशोधन करदे होई इक नमा आदेश जारी कीता ऐ। भारत सरकार नै वित्त मंत्रालय आसेआ हाल च गै जारी कीती गेदी अधिसूचनाएं गी अपनाने दे मगरा जारी कीते गेदे इस आदेश मताबक दमें तिमाही जुलाई थमां सितंबर 2025 ते अक्तूबर थमां दिसंबर 2025 लेई ब्याज दर 7 इशारिया 1 फीसद तैऽ कीती गेई ऐ। संशोधित कीती गेदी दर केंद्र शासित प्रदेश च सभनें जी.पी.एफ ग्राहकं पर लागू होग।



Asia-Flood Deaths

पूरे दक्खण-पूर्व एशिया च बाढ कन्नै 250 थमां मते लोकें दी मौत हो गई ऐ। मॉनसून दे दरान लगातार बरखा ते हाल च गै तूफ़ान नै इस इलाके च तबाही मचाइये रक्खी दी ऐ।

दक्खणी थाईलैंड च सभनें थमां मता नुकसान होआ ऐ जित्थे मृतकें दी गिनतरी 145 होई गेई ऐ। उत्थे बडे बड्डे पैमाने पर बाढ करी लोग छतें पर रौहने आस्तै विवश ना। सोंगखला प्रांत बुरी चाल्ली प्रभावित ऐ जित्थे अस्पताले च पीडितें आस्तै जगह नेई ऐ ते ओहू रेफ्रिजेरेटेड ट्रुके पर निर्भर नां। मलेशिया ते थाईलैंड दे 9 प्रांतें च ज्हारें बद्दे लोक बेघर होई गए ना। इंडोनेशिया बी सुमात्रा द्वीप पर तबाही दा सामना करा'रदा ऐ जित्थे बाढ ते ल्हास-पस्सियां कन्नै 80 थमां मते लोक मारे गए ना।

<><><><><><>

IFFI-2025

56मां भारती अंतरराष्ट्री फिल्म महोत्सव अज्ज गोवा दे पणजी च सम्पन्न होआ'रदा ऐ। महोत्सव दा भव्य उद्घाटन 20 नवंबर गी परेड कन्नै होआ हा। गोवा दे मुख्मन्त्री प्रमोद सावंत, केंद्रीय सूचना, प्रसारण मंत्री अश्विनी वैष्णव ते सूचना ते प्रसारण राज्य मंत्री डॉ. एल. मुरुगन, महोत्सव निदेशक शेखर कपूर कन्नै इस समारोह च शामिल होडन। कई मन्त्री-परमन्त्री दी हिस्तियें दे बी इस आयोजन च शामिल होने दी मेद ऐ। इस दौरान प्रतिष्ठित गोल्डन पीकाँक अवार्ड, सिल्वर पीकाँक अवार्ड ते आई.सी.एफ.टी-यूनेस्को गांधी मेडल दित्ते जाडन। इस ब'रे फिल्मोत्सव च 81 देशें दी 240 थमां मती फिल्मां दस्सियां गेइयां जिंदे च जापान फोकस कंट्री, स्पेन पार्टनर कंट्री ते ऑस्ट्रेलिया स्पॉटलाइट कंट्री हा।

<><><><><><>

Srinagar-CASO

पुलस ते केंद्री रिजर्व पुलस बल नै लाल चौक इलाके च घेराबंदी करिए तपाशी अभियान चलाया। तपाशी अभियान बडे मते व्यस्त कारोबारी इलाके च चलाया गेआ। केई सारी टीमें बक्ख-बक्ख होटलें ते गेस्ट हाउस च चानचक्क छापेमारी कीती ते सैलानिएं दे रिकार्ड चैक कीते। इस दरान उत्थुआं दी सुरक्षा बवस्था दा बी आंकलन कीता गेआ। एह अभियान केई घटें तगर जारी रेआ। खीरी रिपोर्ट हासिल होने तगर कोई बी संदिग्ध गतिविधि दी जानकारी हासिल नेई होई।



Putin-India

रूस दे राष्ट्रपति व्लादिमीर पुतिन अगले म्हीने 4 दिसंबर थमां 23में भारत-रूस सलाना शिखर सम्मेलन लेई भारत दी द'ऊं दिनें दी सरकारी जात्तरा पर औडन। श्री पुतिन प्रधानमंत्री नरेंद्र मोदी हुं'दे साद्दे पर भारत आवा करदे न। बदेश मंत्रालय नै आखेआ ऐ जे अपनी जात्तरा दे दरान रूस दे राष्ट्रपति प्रधानमंत्री मोदी हुं'दे कन्नै गल्लबात करडन। राष्ट्रपति द्रौपदी मुर्मू श्री पुतिन हुं'दे सम्मान च इक धाम दा आयोजन करडन। पुतिन हुं'दी एह सरकारी जात्तरा भारत ते रूस दे नेतृत्व गी दपक्खी सरबंधें च प्रगति दी समीक्षा करने दा मौका प्रदान करग। एह दौनें मुखें दी कार्यनीतिक सांझेदारी गी मजबूत करने लेई नजरिया बी तय करग ते आपसी हितै आहले इलाकाई ते वैश्विक मुद्दें पर बचारें दा आदान-प्रदान करग।



Putin-Ukraine

रुस दे राष्ट्रपति ब्लादिमीर पुतिन होरें आखेया ऐ जे यूक्रेन च युद्ध खत्म करने दी अमरीका दी योजना- भविष्य दे समझौते दी बुनियाद बनी सकदी ऐ। पुतिन होरें किर्गिस्तान दे दौरे दौरान रिपोटरें कन्नै गल्लबात करदे होई कल एह गल्ल आखी। उनें आखेया जे क्रेमलिन अगले हफ्ते दी शुरुआत च माँस्को च खास दूत स्टीव विटकाँफ हुंदी अगुआई च अमरीकी प्रतिनिधिमंडल दे कन्नै गंभीर चर्चा दी मेद करा रदा ऐ। पुतिन होरें आखेया जे रुस उल्लै गै हथियार सुट्टोग- जिल्लै यूक्रेन दे सैनिक- माँस्को दे दावे आले इलाके थमां हटी जाग।



Hong-Kong Fire

हांग-कांग च इक अपार्टमेंट काम्पलैक्स च लग्गी अग्ग च मरने आहलें दी गिनतरी बढियै 94 होई गेई ऐ। 280 थमां मते लोक लापता ना। अधिकारियें चेतावनी दिती ऐ जे एह गिनतरी होर बढी सकदी ऐ कीजे केई लोक अजें बी ईमारत च फंसे दे ना। कुल 76 लोक एहदे च जखमी दस्से जा'रदे ना।



Kashmir Awards

कश्मीर दे दं'ऊ कुशल कारीगरें रैनावाड़ी दे मंजूर अहमद खान ते अलामगीरी बजार दे खवाज़ा नज़ीर अली होरें गी केन्द्री कपड़ा मंत्रालय आसेया दस्तकारियें दी श्रेणी च बड़ी मती प्रतिशठत आले राश्ट्री सम्मान कन्नै नवाजेया गया ऐ। दस्ती तौर पर कलीन बुनने ते

सोजनी कढाई च उत्कृश्टता लेई इनें कुशल कारीगरें गी औंदी 9 दिसम्बर गी नमीं दिल्ली दे विज्ञान भवन च राष्ट्रपति हुंदे आसेया एहू सम्मान भेंट कीते जागंन। इंदे इलावा दंडु होरनें कारीगरें मशकूर हमीद ते मीर अरशद हुसैन हुंदा बी बशेश जिक्र कीता गया ऐ। अधिकारियें दा गलाना ऐ जे इस सम्मान कन्नै कश्मीर दियें दस्ताकरियें गी घरेलू ते अंतराश्ट्री बजारें च नमीं पंछान हासल होग।

<><><><><><>

India-Australia

भारत च ऑस्ट्रेलिया दं उच्चायुक्त फिलिप ग्रीन होरें आखेआ ऐ जे स्थिर ते खुशहाल हिंद-प्रशांत क्षेत्र बनाने च भारत, ऑस्ट्रेलिया आस्तै ज़रूरी सांझेदार बनी गेआ ऐ। उनें ज़ोर देइयै आखेआ जे दवें देशें बश्कार रिश्ते इस समें सभनें थमां मज़बूत न, जेडे रणनीतिक-आर्थिक तालमेल ते ऑस्ट्रेलिया च रौहने आहले भारतीयें दी वजह कन्नै ऐ। श्री ग्रीन होरें रक्षा, मैरीटाइम सुरक्षा ते ज़रूरी खनिजें च सहयोग दे साथ-सहयोग टेक्नोलॉजी, नवीकरणीय एनर्जी ते शिक्षा च बददे रिश्ते पर ज़ोर दित्ता। उनें गलाया जे ऑस्ट्रेलिया गांधीनगर च नमी कौशल एकेडमी दे ज़रिए भारत दे सोलर रूफटॉप लक्ष्यें गी हासल करने च मदद करा'रदा ऐ ते लिथियम ज्नेय खनिजें च डायरेक्ट सप्लाई चैन गी आगे बदा'रदा ऐ। उनें भारत दे बददे ग्लोबल कद दी बी पुष्टि कीती ते आखेआ जे दोनें देश क्षेत्रीय संस्थाएं गी मज़बूत करने ते नियमें पर आधारित इंडो-पैसिफिक बवस्था गी बनाए रखने आस्तै मिलियै कम्म करा'रदे न।

<><><><><><>

Weather

जम्मू-कश्मीर च अगले 5 दिनें दरान तापमान च इक थमां 2 डिग्री दी कमी औने दी मेद ऐ। मौसम विभाग नै 30 नवंबर संझा ते पैहली दिसंबर बड्डुलै मौसम आमतौर पर खुश्क रौह्ने दी पेशगोई कीती ऐ। उआं 4 दिसंबर तगर गास आमतौर पर खुश्क रौह्गा। 5 दिसंबर गी दपैहरी मगरा गासै पर बहल छाई सकदा ऐ ते कश्मीर खित्ते ते जम्मू खित्ते दी किश थाहें पर दरम्याने दर्जे दी धुंध छाई सकदी ऐ।

<><><><><><>